

四庫全書

集部

欽定四庫全書

集部
梧溪集卷三

詳校官庶吉士臣何道沖

中書臣劉源溥覆勘

總校官進士臣繆琪

校對官中書臣雷純

謄錄監生臣黃熙純

欽定四庫全書

梧溪集卷三

元 王逢 撰

菜亭四詠

有引

菜亭者先君庫使之所作也賜進士及第內御史圖
烈圖敬夫書扁江陰儒學教授閻中邢泰亨翁為記
先君年六十輒不仕日課童治圃為徑必直蔬蔬必
方嘗指謂逢曰小子識之此類吾性也先君沒之二

年逢忝部使者薦又明年江南務殷由是無仕進意
而以先志是守并賦四詩揭亭間或尋聲于琴或倚
歌于缶退然自樂殆相遺于人世也

其黃獨曰猗歟黃獨質土德玉惟德惟質是以有葉有
實飢風至矣青青始蔓雨雪既零爛其几案富貴無常
人或汝忘予敢食言長鑱在傍長鑱在傍貧賤之光匪
貧賤之光隱淪之慶

其巖曰彼美者巖歧蹄而茁齊魯之人謂菜之鼈雷風

發春競擷于山久獨不食神往來于山間慨昔君子夷
齊園綺壽考以終猶愈饑死饑弗忍師考終是期衣薜
帶蘿聊從而嬉兮

其黃精曰葉之菁菁如竹葉之青厥根孔美食之可以
長生朝陽之燠時雨之沃君子有之以備旨蓄吳之野
土力貧培隱德樂彌臻孰謂芝也不如薇也

其蓴曰蓴之潔貞蘊藻其朋蓴之芳烈蘋蘩其列曰絲
曰閱可羹可菹君子素貧念不到鱸五侯之鯖大官之

羊鼎折餽覆溪毛無傷登我籩矣薦我先矣載被我弦
永弗諼矣

黃河一首贈胡璉師貢

黃河濁流其源自天四方交亂莫知誰愆靡亂弗寧靡
濁弗清小人之亨君子之貞君子之貞惟道是友小人
之亨乃罪之首雖曰無家有琴有書朝誦暮絃何樂之
如鸛黃其羽集于嘉林願言似之永懷德音

小山招隱辭

有引

小山招隱者雲間孫稷長慶別業之名義則左太冲
反招隱也長慶言行謹飭嘗為文學官兵興遂不復
仕讀書賣藥于橫雲山之支隴有壁峭立泉涓然出
壁下有石空中擊之有聲日歌樂于是蓋期與明哲
士終老焉辭曰

橫雲分兮一股壁鐵立兮石奏鼓桂樛枝兮荃有芳吟
玄狖兮白鶴舞君胡為兮塵土弦我琴兮歌我招泉冽
寒兮天次寥月高露灑兮車音遠迢心悵惘兮不成消

搖君之盟兮孔昭言採兮可道言釣兮維鱸渭濱商顏
兮其道匪殊治亂使然兮出處異趨載絃載歌兮茲山
之礪君之來兮毋遲其驅

故內御史尼格氏圖公挽詞

有序

公尼格氏名圖烈圖字敬夫燕山人國初大父長信
州永豐縣因家焉父布哩葉圖薩從文皇帝潛邸官
至靖江路總管素無子至是媵產公有異年甫冠及第
上親覽策曰必世臣佳子弟也何以知吾家事若是

其詳耶授集賢脩撰中丞馬公伯庸妻以妹累遷南
臺御史按治湖廣江浙咸有聲威順王素不法漁奪
山澤之利尤甚民苦之出數百里告漁奪狀公一無
所貸還之民論奏王罪乃降爵土王憂悸不知所為
會赦免福建廉訪司凡御史至堂幄地衣盛設金繡
公命撤去及視事莫不震懾曰慎毋犯狀元御史比
還內御史某挾私劾某官公以失糾察去職尋三臺
辨明除湖廣省副理問不赴遷生母潘氏縣君塋北

上拜內御史以疽卒壽三十七公短小凝重眉目秀
朗官居巷處言行一致愛豫章山水留寓頗久歲一
至豐為女兄壽女兄誓不嫁患以已租贍之異母弟
早孤長以廕讓族弟特格爾依公學登乙酉進士第
朔州同知子某

篤公產南州胞有紫白異襁褓未勝觴生母痛先逝操
危慮也深十九面廷試詞旨極懇切奏讀驚侍衛文皇
至親覽天眷邁恩例瓊林宴狀元銀屏會佳婿花交歸

香署草偃迂絲轡要職尋屢遷中朝適無事南臺按三省
文物紀綱地御史象執法獨見公不愧先時威順王
畋漁盡民利昔縱魚鳥樂復奪士馬氣閹部俯交廣蟻
犀陰榕荔從容撤堂幄蜚海肅秋霽譽重謗由興才大
衆所忌緒然遂孝思遷葬返北冀女兄老閨閣誓不通
采幣歲展骨肉歡均財及諸季最幼陟龍闕家學益名
世顧予篤鈍姿激越千里志還鄉理書劍承拜內驄使
將依東道光竟灑西州淚脩文得顏回前席失賈誼山

房懸蘿月

公嘗為予書蘿月山房扁

神采形夢寐盛蹟在董狐茲焉

述文義

故東流尹陳公挽詞

有序

公諱文杰字漢卿號默齋毘陵人也父業醫母張氏
憐其好學每所簪珥奉師會宜興鉅室蔣竹徑病公
侍父往就留其塾卒業久之客有寓公過蔣一見納
為友寓公赴浙憲使遂薦授慶元儒學正至則浙東
帥重之俾二子從二子挾貴胄無弟子禮又羣蒼頭

臂鷹鷂日躡躡無度公麾蒼頭去弗聽乃朴教二子
曰吾授堂帖一通班官耳義猶受天子命天子有聖
旨諸王駙馬不得擾學校汝敢是乎因奪一大鷹縱
之蒼頭走白其帥帥怒喚公衆為公懼止之公曰吾
有聖旨在意往帥帥詰曰縱鷹有之乎公曰鷹不縱帥
有罪具言云云帥竦立曰是愛我也遣蒼頭出謝竟
護公歸既辟為其掾一郡大驚滿考除本學教授再
辟掾淮東陞兩浙運司知事丁母艱服闋改江陰知

事三載擢東流尹推贈父宜興判官母宜人即謝病
歸逾年卒壽六十九先是公長郡幕里人殷數請託
先君拒絕之殷銜恨誣行賂告分憲屬公逮繫公復
憲官曰典史王某者清謹人也杰交其子逢亦未始
識一面萬萬無是事惟體察之憲官避公言獨不問
後逢見公于家無一言及之其平生行義率類此公
負詩名監丞陳公旅以兄弟禮最親善嘗誌其母宜
人墓子在有文學遭亂憂悸死孫一

東流家本醫少貧困閭伍賣藥粗給身力學忍刺股祖
瑩良苦志黃憲早稱許參朮收狄籠芝蘭羞謝墅繡衣
驄馬郎遂有茂才舉尋典四明教絃誦喧兩廡元帥勛
舊臣遣兒授訓詁其奴臂鷹鷄躡躡聖宮宇毅然掣錦
條麾去莫敢侮同舍為公懼公且白大府帥歎禮遇加
擢掾器三語再遷東淮閫參贊妙材諳郝超幙兩登單
父琴一鼓先瑩罷焚黃長嘯即解組桑榆晚留景奄忽
悵風雨送喪阻范式能詩失阮瑤憶昔忘年交瓦缶視

鍾呂虞揭歐黃輩恨不與披覩間話良天時盆繚罄餘
緒况予魯連義歷歷在肺腑遺孤喪亂中揆分合予撫
嗚呼同漂零清秋益愁佇

故空谷俞先生挽詞

有序

先生諱遠字之近號空谷江陰鳳歌鄉人也其先儒
起家至先生貧隱居教授能行古道毘陵孫岵以先
世舊依先生待如新知卒殯焉頃年疫傭奴病乞歸
先生曰慎毋疑疫氣相染其善調護踰旬死時兵興

山林盡赭人死多委之壑或以是請先生曰生盡其力死棄之溝中不義也單出為棺窆歲暮春里氓舁木偶神遨井落間至先生門適所舁重而止舁夫告家姥曰神靈報施影響捷宜急祭燎旗下否則殃及矣姥笑曰木偶何能為主入歸吾家爨下物耳衆睞貽去族姪裕親歿有佛者以佛事為解裕毅然曰吾諸父嘗謂形神既離地獄何有今乃自誣親有罪不孝孰甚佛者慚而退其善行及人率類此先生骨貌

金
卷三
清卓類有道者長于古文尤嗜詩亂中吟詠不輟嘗
自叙詩曰蟲之翬翬鳥之嚶嚶機動籟鳴豈得已而
不已乎不得已乎耳予以見其出乎性也壽七十二
子樵孫庠序

空谷俞先生言行慤慤爾襄陽一耆舊東魯古君子奕
葉蘭桂芳晚見長松倚野鶴夕警露天雞晴影水神清
凝高寒眼碧照烏儿州閭董善良工俗變淳美削跡門
徒僧罷迎聚祠鬼貧交有孫岵推食養沒齒義聲及畊

奴亦免溝壑委遭亂接浙行帶索並崔葦免樵性至孝
承順若居里先生但微吟落句益奇詭玄洲摘芝秀翠
嶽決石髓咸瞻星應庚忽夢歲在巳括羽鏃礪道蝨勿
甚提耳忘年感孔融赴弔愧徐穉霜晨高鴻邁獨懼五
湖溪為歌雙梧歌

先生作此嘗
挽先君後附

林哀朔風起

客行天下半波流日滔滔卓然王幙長獨詣見所操
西風吹黃鵠瞥眼雲中翱無彼升天翼欲飛詎能高
讀律三十年弗離州縣勞歸休青山郭緣溪置屋牢

種瓜以為業不復求其曹饌甘盤有魚飲旨尊有醪
兒賢曲奉養未暮樂陶陶奈何百年期懽忻變號咷
望見雙梧樹我每涕沾袍梧樹奚足悲迴躅于焉韜

故贈江西省左丞諡文節汪公挽詞

有序

公諱澤民字叔志號堪老真逸以春秋登戊午進士
第累官致仕禮部尚書歸宣城淮人闔境公倡鄉子
弟保里開會城陷遂遇害越七年詔贈江西省左丞
諡文節逢見大夫士每稱公性廉學尤慎許可嘗推

官平江任法恕允獄多平反垂代題春帖云及瓜當
此日行李似來時迨今為實錄再推信州太夫人道
病公屣屨扶筴輿以行比至總管秦從龍謁謂曰今
晚可就職脫太夫人不諱吾能率僚屬賻之不然
喪誰與舉公曰匿親病而上官是遺親也遺親不孝
覬官斂而私親是貨官也貨官不忠不敢惟命太守
苟推仁湯藥是饋則母氏更生是望某拜德侈矣秦
覲而退太夫人卒服闋起知兗州文教大行就廬問

學者數十百人流民過其治勸義賑之能聞召待制
翰林與脩國史當時大臣有傳旨奉金幣鞍馬求撰
其勛功之碑者卒辭既大臣罪謫傾朝服公先知陞
國子司業集賢直學士尋告老云逢于公無半面雅
荷不鄙夷嘗賜詩序竊愧茂以報稱也姑述其槩系
以挽詞

嵇康貴神交梁鴻重懷賢古來知己遇詎在相摩肩仰
惟文節公清白忠孝全天禧光祿後五世衣冠綿讀書

敬亭裏射策香案前半刺久鳳栖一麾遂鵬騫宮壺酒
賜縹太乙杖吹烟鬼泣脩史筆門泊問字船疏廣忽引
去傾都望如仙浼浼宛溪水酌溪上田鰕菜薦嘉豆
鶯花照堂筵至正乙未間星狗光孛然首倡捍鄉井淮人
竟扼咽侯伯竄草間丁壯死墓邊執公義不屈子姪尚
控拳詈言令顏果勁氣昔鄭畋臣素奏我皇褒贈著史
編憶昔太平日高名南斗懸忘我襪線才贈我瓊琚篇
陋鼎飾金鉉爨桐被朱絃胤朴免售鄭駿骨期市燕空

谷一蛾着衣袖馥蘭荃思君限楚水日夕魚風顛青燈
耿漆室短褐望杞天老成嗟已矣客淚雙迸泉再歌宋
玉些黃鵠高迴旋

寄丘都事

曩僑西湖西遂識東家丘平生五經笥聲價千金裘借
地營茅堂湫隘不容輒文犀水蒼珮無時顧岩幽畦蔬
何青青一飯常苦留推論當世事過許個儻儔別經喪
亂年廬墓兼百憂上馬即擊賊恐貽孝子羞伏承從大

軍烽火空三州生還總慙面望拜多白頭荒原露草根
舉鞭枯骨收捷聞詔東討朱夏行清秋黃池正觀兵移
戍浙上流觸輪避螳螂撼樹憐蜉蝣祭遵日雅歌道濟
夜唱籌所在成相業正自出軍謀月落紅蒼莽熒惑光
射牛白蛇橋長淮睥睨龍驤舟君懷靖四海且復掛吳
鉤機務信有暇緘詩寄滄洲

寄李守道

有後引

西湖有奇士少負不羈才酒外嗜八分席地畫青苔妻

憂餅儲罄甕

闕

開煮雪白石富捫腹視三台久安

素貧賤惟恐富貴來風塵瀕東南衣冠就衰隕慟哭岳
王墓北走燕昭臺平章造次見符檄隨所裁徵兵復三
州疾如破山雷無辜起塗炭寸管萬牛回釋褐慕董生
玉帛讓輿擡丈夫誓

闕

良可哀時予客左丞遠

愧鄒與枚禦寇書

闕

翩然返蒿萊簫雲仰驂騑失道

甘駕駘天風舜花落離思浩江淮願言輟予想曠野多

賢材

守道諱介石性爽邁

闕

以書見省臣命草符檄遂器重之授松江府提控案牘從守鎮江後鎮江失守以不屈辱而死煮雪蘼蕪白石窩皆其齋居室名

三貞篇寄納琳哈喇叅政幕下僚友

梧西女陳氏顏色絕勝玉阿耶燈牕下古傳常暗讀義須嫁宦

作官

人麻象心所足兵麾忽東指烽火蔓平陸魚

鼈遭顛連雞狗同迫迎

作迎

楔猢猻其口反噬机上肉母

子泣相誓寧死不汝辱春輝黯門楮寒日照鬼錄皇天

實鑒臨家廟為慘肅

陳氏母曾宋直講
確之七世孫女

髮婦

惠婦吳俱
縣人一作

里亦在難自判受命獨臂血濺賊衽賊歎為斂縮差差

白刃間偉節驚耳目荒野雲雪暮緬想會深竹水流風

悲鳴星迸萬羽鏃回首陷沒地何限委溝瀆大叅行當

來卹典具簡牘前湖百世祀

謂五代時
烈女何氏

明妝儼車服從

以雙素鸞配享疇敢黷孤蓬任漂轉餘齒寄草木倡茲

三貞篇庶用矯浮俗

奉闕

左丞觀射石幢門外

前徒驅干旄後乘咽短簫君侯美裘帶白馬金轡搖道
出石幢門春始轉柳條公堂俯平曠武士集英翹離立
控角弓百步建錦標眼空熊渠虎臂落李廣鵬登降禮
數新賞罰號令饒忘歸迸寒星決拾迎鮮飈失鵲固自
恥破的奚庸驕先王用觀德令此樂賓僚龍勺暎彝尊
玉帳闕
客卿忝未至屬賦軍中謠川澤魚上冰野
烟尚蕭闕
詢幽隱聊以示逍遙民情自茲得無復

慮三苗

送楊子明知事從觀孫元帥分制沿江州郡

寒日動大江鞍馬散滄洲
漚光滅沒外迴見冰梁浮壯
士無人色旗羽風颺颺
揚君志弧矢笑被黑貂裘
祭輶千仞岡掉鞅萬斛舟
先聲掠淮甸遙制三邊州
元帥統將權言責在軍謀
一言關興喪跬步分陽秋
天地屬閑塞波伏蛟龍湫
孤烟起天際薄暮青轉幽
百里靜雞犬豈但窮兵由
雪貿薺麥生猶聞鑄戈矛
頻年竭土壤經

時委川溝行其所無事凋瘵或少瘳耀德不觀兵當令
第一籌君昔甚惻隱曲宥千俘囚歸裝輕于葉廉價重
琳球敝邑蒙薦臨多暇獲讌游鳳凰巢阿閣黃鵠直遠
投策竹霜實繁知止疇與侔蘆根短刺水鷺斯空啾啾
顧予麋鹿姿蓬藿翳林丘行藏任本性道義期加脩

雨坐梧溪精舍

青梧陰四合長夏含秋清及茲積雨晦

闕

水衣生別

卷鶯聲歇香烟鵲尾橫

闕

溪上思千載一時并

夜坐

落日秋氣昏回溪夜噴薄幽花歌露榭孤螢墮風閣冲
襟謝煩歎廣簟生離索躑躅望明河南天正飛鵲

繆孝子

有引

孝子名倫字叔彝年甫冠博識能文本東平人侍父
宦游于杭至正十六年淮兵執其父將殺之倫哀號
乞免弗聽傾家貲贖父命又弗聽乃自縛請以身代
于是父見釋而殺倫前鄉貢進士樊浚言之予悲倫

之志行不大顯也為作琴操一首期聲傳無窮焉
父存兒死兮兒可再得父死兒存兮兒其天殫聽代父
死全免職於乎人心不泯兮亂有底極

葵蘭贈孫孝子彬

有引

彬值揚州兵變負母而逃兒女散失頌者美其有慈
烏之義而未及舐犢之愛焉故予賦葵蘭一章

葵衛其根日月燭之蘭茁其芽雨露沃之兵變倉卒兮
負親而逃山川險阻兮無乃親勞上天孔仁兮命也兒

遭

義僧行

世降道淪喪盛事罕見之我歌義僧行
斬取國士知僧臻生夏浦俗號徐大師
勇敢重意氣赤手可獵麋張忠郭解流
任俠不計貲臻願出門下致一作故死誓不移盜

尋寇馬洲魚肉乎蒸黎元戎堅營壁大姓深溝池壯哉張父子分率脫項兜父擒子死難家不得斂屍臻聞切齒恨恨死不同時夜即操斧刀奮身斫藩籬徑入牛宮

內斧斷張紱維手殺盜六人力挽間道歸妻孥拜堂下
金幣謝所私上公賜巾裳欲以好爵縻幡然掉臂辭還
山弄摩尼方令國步艱中外罹瘡痍銅虎盡懸綬鐵馬
誰褰旗嗟爾匹夫臻足張三軍威何不食君祿為君靖
淮夷收名魯仲連千載為等期天秋黃葉脫日暮玄雲
馳歌詩節鼓吹用壯吾熊羆

壯士歌

明月皎皎白玉盤大星煌煌黃金丸壯士解甲投馬鞍

蒺藜草深夜夜寒劍頭飲血何時乾

義兵謠

春虹白冬草碧八月黃河火雲赤將衣我衣更食我食
望塵走馬當殺賊

寒機女辭

鴛鴦機滿東西舍雪繭綠來日相射世俗競染紅藍花
妾心鍾愛金絲柘君王錦繡焚殿前天孫鳳梭蛛網懸
織成雲霧製龍袞萬一薰香分御筵

朱夫人有序

夫人諱元琇江陰知事朱道存之妻都漕萬戶費雄
之女也至正十六年江陰亂夫人依其父居松江之
上海未幾上海縣陷苗軍復縣大掠夫人驚遽出卧
内時苗手刃以入將犯之夫人怒叱曰吾貴家女貴
家婦夫君見勤王汝本官兵奚為犯我投釵珥于地
苗攫之去既苗沓至索貨無有遂驅迫就道夫人揆
不免乃攀堂楹厲聲曰吾義不辱苗狗忍辱我耶叱

遇害爪入楹木血沁于指哀哉始先君庫使解官歸里逢適主于其家每與盛宴輒缺然若不甘者知事言其故于夫人他日復宴夫人親為別具饌命子文博文禮昇示逢曰此奉尊翁自是以為常明年逢過其地嗟夫人之生也柔惠足以德于人歿也貞烈足以表于世謹為辭以弔之辭曰

青蘗花白浦水黃雲日黯慘風悲涼停轡西向三酹觴旂旌葆幢來混茫若有人兮凜如霜星流電馳惟一作誰

可望微言夙習大洞章功成拔宅居帝鄉鵲河蟾窟肆
翱翔笑援北斗挹酒漿帝曰欽哉無太康下為叔世扶
綱常進規退矩禮自防釵荆裙布令孟光尊姑養之植
德堂朱氏堂名階珠樹聯瑤芳明璫蒼珮森琳瑯槌鐘考
鼓樂未央楚氛遮天耀天狼飄然歸寧父母傍正坐漆
室憂葵傷官兵寇我加劍鉞昊天倚杵忽變桑身有賤
血無迴腸稽首再拜淚雨滂輶馬直上縣鸞凰

以下原

闕

殺君之餘春風紫燕停紫衢錦纏繡絡舞鷓鴣胡琴秦
箏間吳飲酒面花影紅扶疎君樂滿座容顏舒再拜壽
君明月珠願君世世金虎符縣籍無我甘樵漁

君家柳

君家柳萬株一色鶯黃酒龍鱗波暖裊翠烟飛花直渡
江南天倉庚立曉燕穿午薄暮啄木聲丁然腹中蝨蝕
皮齧馬舊陰半減金城下長條短條屬行人猶有持斤
晚之者秋來大地落葉鳴心憶陽春泪如瀉

趙氏雙珠辭

遊鯉山石高孱顏遊鯉溪水清洄灣中有我我青結鬟
望如春雲不可攀壬辰仲冬冠蜂起乳臭將軍先披靡

民人顛連社稷圯我固當為貞白鬼後來

乙未年

小妹復

被驅亦葬魚腹全其軀山高水清幾千載虹月夜貫雙
驪珠夜深鮫宮屏機杼風吹草寒髑髏語何由生長江
沱間及見王睢鼓衣羽願回堯天行化日女子有家男
有室地下甘心燈似漆

夜何長三疊寄周叅政伯溫鄔僉院本初

夜何長日苦短夜長復寒日不暖深林大薄鷗鳴滿尾
頽魴魚遊纂纂千年古鉄紫氣纏赤帝當之白蛇斷中

朝老臣雙珮蒼憂心鬱紆寢息忘鳳凰在笄驥服箱雪
埋石棧冰河梁夜何長六龍回轡東扶桑

夜何長日苦短夜長復寒日不暖蒼梧九疑雲思遠驚
鴻亂落夫差苑漢家騎尉雙龍蒼酒酣起舞隘八荒疾
風吹沙百草霜玉缸朱火青凝光夜何長帝車高轉天
中央

夜何長日苦短夜長復寒日不暖欖槍叅旗燭雲罕樹
樹梅花落羌管江南布衣雙髻蒼歲闌獨立氣慨慷衣

冠禮樂制孔良路迨無由貢明堂夜何長啟明耿耿天
東方

梁溪行贈嚴子魯叅政

梁溪之陰太湖陽錫麓西下盤羊腸土俗驚悍民鴟張
負固不貢亂典常明公是時騎飛黃三尺白練揮冰霜
西定汝潁南保杭復來觀兵周處鄉方將增陴深浚隍
楚氛一夜掩斗芒奉頭鼠竄道相望獨有殉節臣姓楊

謂文

載員外明公退此招散亡昔我仇寇令顏行千百之衆尺

寸晷日食蒲螺草塞創戰十六月莫禦當誓欲手舉東
南綱赤葉楓落鴻雁翔淮閫共戴吳天蒼金戈煌煌旆
央央旋師城闕從鼓簧父老羅拜勸酒漿武惠厚德宜
爾昌龍衣封錦來尚方璽書錫命登岩廊吾君論功邁
漢皇屬國肯負蘇中郎事業益大身益強不忝異姓汾
淮王

奉陪神保大王宴朱將軍第聞彈白翎雀引

有序

白翎雀燕漠間鳥也初世皇命伶官石德閭製白翎

雀曲及進曰何其未有孤嫠怨悲之音石德閭未之
改而已傳焉戊戌冬淮藩朱將軍宴大王于私第逢
忝座末時夜電霰交下衆賓相次執盞起為王壽逢
亦起王命左右鼓是曲且語製曲之始俾歌詠之逢
謂續事本實左氏所先故鋪陳興龍大略而不暇他
及也

玄陰亘天雪欲作將軍西第夜張幕銅盤蠟光紅照灼
四座傾聽白翎雀雀生烏桓朔部落大樸之氣元磅礴

地椒野糝極廣莫穹廬離離散駝駱黃羊蘆酒雜潼醕
鷹狗畋獵代耕獲太王肇基不城郭青春建橐宵罷柝
聖澤滂沛蔓綿絡風淳俗龐法度約乾端坤倪露冲漠
羽毛鱗介並飛躍庭祠歲響咽管籥雄雌和鳴莫我樂
帝皇赫然太陽若八表晃蕩氛盡却前驅屈盧從繇弱
睢盱嗚咿萬狀錯遂朝玉帛解組縛大明宮開夾花萼
文監武衛盛材略葱珩穀璧映霜鏐五雲夔龍奏韶獲
九苞鳳凰降寥廓德音威儀匪予度萬姓拭目瞻阿閤

軒轅伶倫兩冥冥八十年來事非昨優麀雜亂人道削
咬哇哀淫頌聲鑠皇孫讓賢執鼓鐸巾綦鵲尾黃金杓
殷烝體薦嚼復嚼巴渝舞隊驩回薄供奉革鞜衣狐貉
銀箏載前酒載酌延秋門深魚守鑰緱山遠度吹笙鶴
淮南昔者鷄舐藥千乘之國棄樊蹻方今羣雄自開拓
拔刀把稍爭刺斫為臣義同葵與藿將軍固合鞭先着
蓮壺漏沈薇露涸枯梢號寒風隕籜百禽啁噍電霰霍
冰花亂點真珠箔箔中呱呱情陡惡供奉若爾停絃索

吁嗟白翎將馬託有客淚下甘丘壑

奉陪杭右丞程禮部以文字文憲僉子貞魯縣丞
道原宴周左丞伯溫館舍時聞河南李平章恢復
中原

西湖館舍開新秋三峰倒影紫翠流白馬彫戈駐遠道
金魚玉佩羅林丘二孤五老獨神往八公六逸同天遊
時維小康況大比萬乘少紓東南憂如澠之酒官寺送
風生酒波鱗甲動荔子漿凝赤露香鶻肪炙作黃冰凍

歌袖頻熏婆律膏
渴羌解奏參差鳳
右丞闕閱霄漢逼
諸叟文章臺閣重
罍噐駸駸落日涼
菱花遶葉掩冉光
驚飛先自有烏鵲
寡宿未必無鴛鴦
堯封禹跡烟莽蒼
宣髮固短憂心長
側聞汴破濟欲下
百姓亦望臨淮王
山人厭亂喜莫量
笑整冠帶為舉觴
醉後不登嚴武牀

惠孝子行

有序

惠孝子名連字子及曾大父疇累遷寶章閣待制常
德知府致仕司農少卿卒翰林池聖夫銘其墓曰金

玉其相表裏無偽槩可見矣子及受學于陸子方先生嘗述江革郝鑒二贊其贊江有曰免力甚武母安勿怖兒身既豫養不可寔前行弗獲後顧則逼我心欽欽卒與盜即母免一身安能異塗免亡母亡將焉用俘其贊郝有曰民儉于食累累為瘠推活君子職敬惟德君不苟活念我二免骨肉之恩生死共之弗卹爾生胡後而死氏志弗獲全是口體士矜誦之後江陰亂挈母俞及諸甥姓間關百罹避地吳下逢嘉

其言行贈之以詩

吾邦有龍虎村中有宋朝司農忠公之曾孫司農三登
魏科蚤選衛王婿兩作茂宰一出漢朱轡百年雲散金
碧氣衣冠禮樂八九存曾孫自號輶輶生又號蹇連子
負材弗施甘與世相忤未嘗入城見州尊或逢夸毗徒
掉臂決去如林獬豸日但讀書蓬華門講畫授弟子愉婉
問清溫堂前植橘堂後樹萱百畝之田五畝園征夫道
暍馬汗赤抱膝方看高鳶騫優哉游哉樂難諼柔兆渚

灘歲天狗闕丘樊達官大家驚潰奔水魴陸虞盡啗吞
是時輾轆生悒僂膺屢捫非不能持挺刃佩玃眈靖鄉
國清札昏母年八袞罔極恩外甥在侍傍無援誓全古
孝義坐使薄俗敦攜扶于野褰涉于疊慘冒霧露饑採
和羹妻孥臬兀兵火際亦解委曲奉壺飧天道昭著神
佑護卒得命脫蟻聚并蜂屯蹇連子蓋嘗口撰江革郝
鑒二贊累百言文煥炳若星斗繁聞諸人臬者褫魄示
諸人獍者喪魂江郝名與垂乾坤乾坤蕩蕩敞帝閭我

金
卷三
歌三反烏滿原春風一夜回孤根

題三馬圖

卷開三馬風雲起誰其畫者趙學士渥洼舊感驪龍精
禹門曾浴桃花水並馳定是不契需合與周王八駿俱
烏騅赤兔售非主千金之骨成泥土丈夫懷材莫愁佇

鶴招有序

予友曹炳氏畜雙鶴于皆春園露昕月夕巾烏紗被
髦衣與之弄影接武林壑間若超出世瑤物我相忘

者數年辛丑秋一日雄嗒然悲鳴驚視之雌折足斃
石崎下心甚悼焉為援華陽故事用玄黃幣瘞所居
貞溪傍既封其土屬逢賦鶴招誌諸石

馬之死也埋敝帷鶴之化也招予辭咏青田芝飲瑤池
冠朱衣縞玄裳垂神仙中人受以羈日遨寥天騫鳳螭
良苦未若歸來兮風塵軒囂波浪瀰騏鴈羅鷺弓繳悲
主家天開林壑姿石砮魚影布叅差露昕月夕苔莎滋
引吭和鳴舞傲傲關雎之樂不可支胡然孤雄怨仳離

金定回風集卷三
主亦為爾意淒其蕙帳燈炮香倭遞臨臯道士夢經時
不信視此冢累累

歎病駝

狂夫東遊乘白驪道路適遇病索駝紫毛無復好容色
肉鞍尚聳雙坡陀南人從來不夢此私怪目擊臨干戈
泉渠元自控蕃落天苑畢竟連銀河吳郊楚甸水草淺
任重却欲千斤過青袍朝士為起立茜帽番僧時撫摩
熱風吹塵鼻出火積雨成潦瘡生窠牛蚤狗蝨苦嘅血

未由驅除知奈何頻年出師數百萬熊羆獅豹相奔波
豈期獨後死溝壑餘光所及良已多老矣首帕短袴靴
手持鞭策涕泗沈憶昔灤京避暑日氣骨礪危從蠻和
沈沈金甕夾銅馬裊裊錦帶懸靈囂服勞輦下藉翦刷
屈跡澤畔甘蹉跎疇能推廣愛烏義沒齒仰飼公田禾

悼炎洲翠

炎洲翠美羽衣穿花掠藻鳴春暉讓王城頭燕分飛淮
陰祠下梟相依梟不孝翠先死能言鸚鵡亦已矣吁嗟

方郎闕

起

俞丞獲印辭

己亥七月城錢塘四十萬夫翻汗漿
九旬塵沙霾日黃
幾夜草上生輝光
凌晨夫長賀得印壇紐
璫文玉澤潤
官曹傳看連六郡
丞名適同丞有分
君不見侯王昔者
親佩之功業弗建
終棄遺城今百雉
高巍巍呻吟盡化
為歌詩時來更取
左顧龜

烏啄啄言無錫
呂志學

烏啄啄行踽踽朝啼暮號反哺無所變龍在朝虎在邊
孝子之心若荼苦天高蒼蒼下厚土耳若無聞目無覩
虛簷雨懸燈火青頭白生離夢中聚夢中聚今六霜明
年作歌歌壽昌

張叅政手植榆歌

有引

榆本高出羣木上會兵興山盡童曾孫守中去其半
蔽以藪篠然生意委苑廊廟具固無恙逢一日獲讌
樹下既醉歌之非但歌榆也感叅政忠憤嘉守中孝

敬云耳叅政名瑄開海漕征瓜哇有大功于朝中當
廕祖文龍都水監職得七品官隱居讀書尤善畫歌

曰

春光堂前蘭坂側孤榆根固亭亭立翦截猶全大廈具
培封敢忘前人德至今龍蔥陰滿庭在昔昂藏枝百尺
海窺黑水龍伯宮地瞰炎風瓜哇國老槐並去天尺五
披拂星辰長雷雨寶樹方圍錦絲障虬枝忽斷黃姑渚
野雉由來是鳩媒樓船悔不將童女萬國旂幟歸帝業

半頃苔基系民土茲辰客會鷓鴣羣麟趾公族皆能文
純邊膾落鑿刀雪花下酒灑紅缸雲虹地有躡虹新烟迢遞
近臣火餘景低徊西掩曛興酣墨汁飲一斗弗嗔書浣
羊欣裙

謝沈奐有章素段有引

奐攜李人大父烈字秋田明尚書善琴大德間由郡
學錄累遷常州推官所在著美績奐乞逢誌其墓而
銘曰有學有文有社有民出際盛明考終厥身子孫

繩繩天厚孔仁維秀之鄙維涖之潛德不稱位何百
十人公位通顯公德雅馴我作銘詩過者惟寅既持
謝素雲官段上存宗師吳全節題封蓋文宗所賜分
遺大父者也至是逢貽壽女兄張婦復歌詩謝真

黃姑舊織機中段題封進入通明殿石硤平鋪月下冰
銀潢倒瀉天邊練上卿適侍玉皇案賜歸仙界訶雷電
法曹得之三世藏未嘗浣點時爭羨山人近宴采藻亭
與也求撰墓碣銘蟪蛄蚋蟻滿秋思篋笥出此驚爽靈

碧桃色染東極露白虹影貫長庚星吳都繭絲紆皓彩
漢苑芸草留餘馨雲聯朶朶不斷脚恍惚駢飛萬淫雀
方空吹綸何足數實蒙火毳宜高閣用裁朝服佩龜魚
用製道氅騎鸞鶴以予貧賤合鯨卷多爾孝敬難馬却
女兄日誦大洞文十年著破玄霜裙到家貤壽非矯譽
所貴來自先帝君風塵盡室幸苟活江海故交能致勤
興至援筆報萬一或者盛事相傳聞

華韡堂

邵崇大父遭兵驅髻稚北行形影孤渾飲肉食調狗馬
白晝快樂夜憂虞曾冰塞磧際草莽行搖飛鳴嗟雪姑
遙知親老兄侍側贖子購弟金不惜卅年目斷苦烟霧
一日書闕返鄉國殺雞上冢木已拱對花吹塤春盛昔
崇也與掾永孝思華韓堂開胥浦渚亂離復見田氏樂
急難無愧周公詩今者魯衛政教衰有甚煮豆然萁時
願保嘉樹長華滋雪姑並巢連理枝

同曹傳幼岩承平文允宿張會嘉西齋

鄉中三人清似鶴異縣相逢宿茅屋踈窓金波地流月
連榻翠寒霜入竹一人袖攜詩一束同有女兒身亦獨
一人舉室葬魚腹不欲云云淚盈掬長松樹倒哭杜鵑
搖搖寸草春風前春風尚許草報荅過江上冢知何年
過江上冢待兵戢登堂互拜親無及亂離孝友莫我期
雲霄事業須汝立東家枇杷花滿林遠山秀列九青簪
甕頭濁酒蛆浮白天外徵書鶴送音

黃道婆祠

有序

黃道婆松之烏涇人少淪落厓州元貞間始遇海舶
以歸躬紡木綿花織厓州被自給教他姓婦不少倦
未幾被更烏涇名天下仰食者千餘家及卒鄉長者
趙如珪為立祠香火菴後兵廢至正壬寅張君守中
遷祠于其祖都水公神道南隙地俾復祀享且徵逢
詩傳將來辭曰

前聞黃四娘後稱宋五嫂道婆異流輩不肯厓州老厓
州布被五色縹組霧紉雲粲花草片帆鯨海得風歸千

柚烏涇奪天造天孫漫司巧僅解製牛衣鄒母真乃賢
訓免喻斷機道婆遺愛在桑梓道婆有志覆赤子荒哉
唐玄萬乘君終醜長衾共昆弟趙翁立祠兵久燬張君
慨然繼絕祀我歌落葉秋聲裏薄功厚饗當愧死

長樂未央玉璽歌為秦景容總管賦

赤龍銜日照赤子白蛇橫斃烏騅死東風吹冷咸陽灰長
樂未央連闕起昆吾寶刀截瓊肪陰文小篆雲漢章盤
螭作紐徑二寸歷歲四百傳天王黃星李明銅爵舞銅仙

淚泣如絲雨盜將神器竟不歸璽亦漂淪頻易主使君
購得心良苦君不見豐城有劒氣上衝米船也貫滄江
虹陋歌先附蘇卿鴻

題余道本所藏大父元善號竹所卷

有序

元善諱有慶本韶人十二世祖靖仕宋諡曰襄有七
世孫哲通判嘉興幼子昇贅華亭朱氏遂占華亭籍
又五世至元善讀書慕義粟補司征官既不樂仕以
隱德終蚤歲提刑陵陽牟璪雅重之後浙憲使薊丘

張雲鵬宣州推官浦城楊載鄉貢進士江陰陸庸四
明陳沅咸交焉題誌具在子允中繼歿竹所亦廢為
烟墟露莽道本敦儒行情有不勝言者屬予序卷末
且徵詩云

丹霜羽人粹且溫系出慶厯名臣門戚然袖出竹所卷
前輩留題今具存竹所當時棄官日籜箨猶箬氣深密
大中參差鳳叶鳴小宜扶老鳩為匹嘉魚有羹尊有醕
何者是賓何者主一碧寒光谷水潭萬玉秋聲石牕雨

喪亂相尋廿載間
斬竿採箭不曾閒
花羅珍護陀尼錦
月朗天空飛珮還

敬題汪氏天馬圖

世皇勃起燕雲開
網羅六合蒐英材
許公劉公駕萬乘
奔走扈從皆龍騄
流傳駿骨八十載
始見拂郎天馬來
天馬來光昭回却
追電殿奔雷周圖
揭贊漫汗九垓星
房元精降恢台鍾
毓水德真休哉金
溝柳拂青梧搃弄
影路寢鳴義臺今
或以之靖氛埃三
衛七校紛後陪芻

豆莫漫肥鴛鴦豆莫漫肥鴛鴦

歲星漸高贈王伯純進士

歲星漸高辰星光鎮星不動天中央
熒惑退舍太白斂
晝芒南斗尚爾雲微茫有美一人被褐裳
思君思鄉垂
十霜馭婆娑盪氣鬱蒼王屋石室爰相望
願陪先驅孤
四張歲星輔日照八極還種祭田汾水陽

喜聞整飭臺綱詔至是日雷雨因感時事寄何憲

幕

幾年十月百蟄驚今年二月雷發聲陽和一氣轉大地
忽忽草木回勾萌白頭偃僂賀新雨惟恐天威咫尺收
冰訇網常錯亂雅道壞誰本王度加脩明何物梟獍徒
遂害烏鳥情謂盜殺越守臣格埒克固實烏鳥昔日辭桂枝集枳荆超
遷柏樹朝陽鳴啾啾衆黃口寒煦饑飫賴生成颶風翻
槽巢銜枯復經營其雛寢長大不但反哺報所誠梟創
腦撓磔腹嗚呼烏鳥卒存孝令名我有三尺蒼龍精亦
欲為帝擊不義除不平況君揚翹舒英如鳳翔九仞如

玉價連城君奚不進臺中評令人思之涕泗橫蘇堤柳
青驄轡輕暖紅花霧撲野鷺黃滕官酒瀉山綠而乃醉
踏湖上晴碧雲裔裔東南征

題紅女二圖

春閨寂寂春漏長美人校度金鴛鴦綠雲蔽地柳陰合
紅露撲簾花氣香遊蜂釀蜜燕將乳準儼郎來裁白苧
衣成稱體復稱心不惜尊前為歌舞

疎星不流孤月耿銀河散落霜花影翡翠巢虛小閣寒

蝦蟆更斷重門靜沈水微烟戀舊熏停針欲繡錦回文
郎作長安一輪日妾化巫山一朵雲

冥鴻亭詩

有引

逢早遊金陵臺臣有以茂才異等薦以病辭浙西分
憲繼以晦跡丘園薦不報兵興大府辟佐戎行又以
材不勝任辭客公侯間俟回鄉里而又不可得避地
青龍江上扁亭曰冥鴻非敢自廣姑志所存詩曰
冥冥飛鴻八荒一字三光並明周視下土下土之人徒

敝罔苦鴻飛冥冥萬里一息與造物遊邈見其跡蒙莊
大鵬闕掩溟北彼啄者鳥彼喙者鳬彼甘區區梁藻是
圖鳳凰來儀斯德之符山有灌木木有深枝無枝無巢
鴻生連蹄鴻生連蹄天其汝為天其汝為而我無造作
亭名鴻是則是倣惟倣伊何高舉遠蹈

小草軒詩有引

或者病予冥鴻亭因別闢一室名曰小草復賦四言

一首

茁彼小草于山之岑
溉以流泉蔭以嘉林
雪霜相尋雨露亦深
根癢既固綠葉靡歇
沅芷澧蘭同是芳烈
伊人王孫斯曾傷別
不曰遠志奚小名之
在山莫尊出山莫卑
卑卑以自牧君子謙
為天地沍寒朔風孔
棘衆就枯落蒼蒼其
色色焉蒼蒼不回厥
德春陽潛復勾萌蹶
張長養泰和衣被景
光子忍佩之爰樹之
堂爰樹之堂爰獻之
國忠君敬親匪頌維
則則之維何小心翼翼

送貢泰父尚書整治福建鹽法

雷雨從天起，涸鱗吳刀光彩照南閩。不惟鹽議張林得，
況乃邊籌杜預親。穴渡尾閭偏少瘴，星分喉舌早移春。
青烟亭竈鄰蛟室，赤汗丁夫類鬼薪。寬減一分存草奏，
貢聯諸物上楓宸。乘驄使者交游數，豺虎何由感化馴。
寄柏希顏憲僉

春申山上駐旌旗，千騎中間識漢儀。

公嘗以常州同知總兵江陰

嚴

警正當傳箭，日清談曾到結繩。時車前軾畫熊羆，象柱
後冠存獬廌。姿狀杜葉青，陳燕饗甘棠陰。台被歌詩法

星一夜臨丹極爽氣崇朝轉赤墀遂奉綸音司奏劾再
持使節寄安危霜飛五月無朱夏天入三吳有釣絲蒼
莽城池餘燕麥森茫烟水接鳬茆民生轉徙家何在道
殫相望命若遺河內便宜須汲黯宮中直諫憶辛毗邇
聞行部收殊蹟不忘斯文忝故知七載兵興無限事願
趨鈴閣共論思

趙仲穆待制

故王孫暇日湖山接討論萬雉金城猶遠汴

六龍雲氣總歸元士林冠蓋交中國黃閣絲綸萃一門
緒業遠宗虞祕監風流曾似馬文園歌殘白紵花圍席
書罷烏絲月滿軒回首風塵重懷想爾家餘澤在乾坤

題息齋李公墨竹

有引

公為婺州路同知時先君獲會于杭深蒙友重嘗作
風晴雨嫩四竹以贈其嫩竹中一古樹尤蒼潤秀特
因指謂曰此類若英妙中氣幹耳先君每感其言倏
已四十餘年矣兵後展玩為之惘然敬述四韻

東南文物萃時康
先子曾瞻太白光
湖上薰風歌綠水
袖中霖雨作蒼簑
零陵自冷湘君淚
淇澳詩存衛武章
猶有佳人在空谷
天寒愁思碧雲長

寄買靜安靳利安二樞幕

宥府分兵建羽林
芙蓉帷幄靜沈沈
風塵地迴陰靈泣
霜月城高紫氣臨
一飯不忘當世事
百年誰識遠臣心
別來豈但懷思切
卧聽關河過鴈音

送省架閣張彥升使淮府慶宴還省兼簡張夢祥

樞掾

江南江北地全歸
弧矢星明燧火稀
丞相天寒青建幕
使臣春日繡為衣
殷烝體薦殊恩禮
金券丹書煥德輝
好約鄒陽同倚馬
梁園醉賦雪花飛

陪宴周伯溫左丞劉君楚侍郎是日席上出汝瓷
鴨爐焚香因賦以簡二公

堂啓芸暉宴相君
鷓鴣綠鬪清芬一絲欲染花間露
五色微生日下雲
袖惹氤氲思漢閣
詔頒綸綍擬皇墳

時劉開
詔吳中

東吳二月無塵事看劍攤書任酒醺

簡鄔同僉

南粵稱臣陸賈勞漢廷何愛璽書褒恩波遂與三吳濶
爽氣真連北斗高鸞嘒羽林交杖杜馬閑沙苑暗葡萄
天心厭亂民懷德未說關河恃虎牢

送觀河道員外祠南鎮使淮府還京二首

親奉天香祀會稽黃封玉檢爛金泥地同南嶽臨朱鳥
祠俯名藩異碧雞三秀乘春沾雨露五雲披曉見端倪

好祈神化資神武縹緲前旌舉白霓

南鎮春回草木青溪毛猶帶舊時馨黃塵荏苒民誰賴
黑海滄茫使有星為愛寶書探禹穴豈揮清淚向秦庭
萬艘轉餉成山道想見風雲護百靈

送王季德主事祠南鎮還京

干羽春明玉宸閒皇華躬遣祀稽山蓬萊雲霧隨封檢
數落仙曹降珮環宣室舊承前席問樓船今駕海濤還
東南父老憂時切落日扶藜得重攀

送曹德基尚書督海運還京

公府頻年集大勲使傳天語勞憂勤大官酒注芙蓉露
上使衣開錦繡雲舶趁風清通瀚海招搖光澹靜妖氛
還朝闕道扶王室首奏何人策冠軍

吳江第四橋阻風

虹梁雪灘光滅明風著岸脇冰鱗生空郵天晚亂木葉
太湖日寒多雁聲馬周斗酒足自慰龜蒙扁舟有餘清
囊中青錢不滿百聊買小鮮來就烹

風雨獨坐

先生閉戶坐連朝
春雨破塊風鳴條
九峰三泖野陰合
五城十樓雲思遙
蝸牛戴角上金井
蝦虎成羣迎白潮
桃花底事苦爛漫
幸有尊酒慰無聊

秋感六首

吳門葉落季鷹船
朔野霜橫白雁天
三楚樓臺餘夢澤
兩京形勢自甘泉
采雲帳幄冷風滿
瓊樹花枝璧月圓
本是宣光中興日
腐儒長夜泣遺編

紛紛攘攘厭黃巾妖血徒膏草野塵馬化一龍猶王晉
楚存三戶未亡秦颶風天靜浮青海朔漠山高直紫宸
莫為鬼方勞外伐槃弧箕服最愁人

豆苗瓜蔓未應稀菰米蓴絲積漸肥南極有星天半隱
東維無地海全歸連城不換相如璧百結何妨子夏衣
回首故山荆棘外幾年空翠鎖烟霏

苔花薺葉繞林扉獨立蒼寒見紫微夜久長庚隨月上
天清高鳥帶霜飛東南吳會三江入百二秦封六國歸

烈士暮年心未已無言思解白登園

南越東吳帶楚臯頻年醉眼送飛毛滄洲露白蒹葭滿
甲第秋聲蟋蟀高九日天涯桑落酒三軍城上柘黃袍
試觀漢後詩人作獨覺遺風屬阮陶

鯨魚風息淨江波軋軋機絲響薜蘿華髮道途秋日短
曠懷樓閣暮陰多浮查受宿炎洲翠細草從眠墨沼鵝
心自隱憂身自逸幾時天馬渡滹沱

聞鐘

首宿胡桃霜露濃衣冠文物歎塵容皇天老去非無姓
衆水東朝自有宗荆楚舊煩殷后代越陀新拜漢官封
狂夫待旦心良苦喜聽寒山半夜鐘

奉謝嚴子魯左丞枉顧

畫省春閒退自公草堂枉駕走鄰童兩川使節瞻嚴武
五郡民心憶竇融

其祖武惠公以山東五十四州歸附

簪履百年門客盛

詩書今日野人同高秋擬踐論邊約絳蠟光搖虎帳風

寄倪元鎮

笠澤雨晴烟霧除放船適逢俛隱居
黃河泰華意氣若金薤琳琅書畫如露
浮箬葉熟春酒水落桃花炊鱖魚
莫嫌忘形禮法外難得合并憂患餘

題包旂彥招管溪別業

夷吾溪上草堂成江月浦風相與清
蒼苔白石琅玕長積水疎簾翡翠鳴
鮫女賣綃新識主家人舉案笑呼卿
膝前況有兒如玉收拾餘金鑄短檠

送葛玄素住持普福宮

海虞山色秀屏開紫氣丹光湧玉臺父老舊瞻雙鳳下
神仙令跨五羊來綠林烽火沈虛壁蔓草春風轉上台
聞有子規栖未穩長松闕

簡林叔大都事

省闈無事日盤桓猶是中朝供奉官半臂綵綾披月下
三神琬一作珠闕望雲端蒞離草變鯨波落首霜花開鴈
塞寒因話朔南聲教在一回相對客懷寬

贈呂醫師

有後序

橘花開處杏陰青百草吹香覺地靈貧士願留賒藥券
故人思續衛生經玄霜玉白睛猶濕華月丹房夜不扃
張叙苦吟仍病肺好和熊膽護修齡

叙字彥倫吾鄉黃田人也家甚貧日往返十里從予
讀尚書鄉之大夫士咸愛其才志篤敏將進乎學予
獨懼其神氣不充久而殆病也未幾果病予深憂之
遂用宋清故事具券即醫師呂如心氏如心曰吾道
本乎施濟竊計清所獲特市道之雄耳奚券為哉且

夫人之常情孰不願賢而利達富而壽考幸生而賢
賢而苦貧貧而苦病病而不能藥我是何心哉遂反
其券命日服藥一裹至數十裹而愈愈之日予詩之
而復序之蓋所以旌如心之德而為彥倫慶也

酬夏仲寶府判包德文提學德

闕縣尹

春日頻承鄉里書鴻山別業

闕

不異王官谷

馬幣曾過

闕

難數移居

使還為報諸先

闕

尺餘

簡趙茂叔山長

木槿花開落日邊感時興歎撫遺編何蕃仁勇真難及
江總才名不大傳闕舊通秦道路柴桑猶屬晉山川
嗟予執掌風塵世頭白終師魯仲連

簡張光弼員外

瘦馬羸童退食遲倒衣相見即相知風流不減張京兆
心跡無慚柳士師枕上燕鶯鳴曙日道傍花絮罥游絲
天機人事觀都遍笑約西山賸采芝

簡陳韋羌員外

幕府深嚴午漏遲
簾文簾影碧參差
總傳白馬陳從事
每念青袍杜拾遺
大地風塵憂未解
扁舟江海去無期
涼天鴈叫芙蓉發
許奏軍中鼓吹辭

陪淮南僚友汎舟吳江城下

波伏魚龍夜不驚
菱花千頃湛虛明
吳儂似怪青絲馬
漢月重臨白帝城
世說竇融功第一
獨憐阮籍醉平生
樓船簫鼓中流發
喜及東南早罷兵

送何憲幕北上

千里妖氛百戰空
送君先謁建章宮
吳牛漫喘雲閒月
天馬終依冀北風
仙掌向秋清露滿
銀潢流派大河通
至尊宵旰仍多闕
臺諫何由得數公

送毛弘道赴內闕

闕

兼簡任子羽憲幕

越王臺端驄馬青
憲郎一鶚上青冥
二儀開闔車書正
中夏清寧草木醒
都邑載瞻春有象
東南私喜客無星
鄉人邂逅詢消息
十載鵑啼少眷令

憶程禮部宇文憲僉二先輩

憶陪清宴嫩涼天南北雙峰几杖前
文行並優耆舊傳
笑談曾及汶陽田
高風鴻鵠歸三島
明月蘭苔在一川

私歎衣冠就淪落東南誰

闕

年

送薛鶴齋真人代祀天妃還京

蓬萊宮裏上卿班
代祀天妃隔歲還
日遶五文皆御氣
海浮一髮是成山
風霆夜護龍鸞節
雲霧朝披玉雪顏
聖渥既隆玄化盛
轉輸應盡入秦關

龍江齋居簡許怡軒江城南王至訥瞿間野王晚
翠

投閒田野罷從軍
孟夏齋居樂可云
銅滴水寒蘭葉露
紉簾風颺柳花雲
門生載酒還多酌
道士籠鵝或一群
近種黃精三百本
秋高分寄許徵君

鷺粟花開蠶豆肥
梓梧陰合乳禽飛
一庭生意何曾歇
四月青春不見歸
只為身閒家有此
尚論心壯事多違
鄰翁也道山人樂
顛倒烏巾鶴氅衣

題松隱菴

闕

名泉瀉玉虹九龍分遶梵王宮
雨餘清氣來天上

風

闕

鳴聲落座中松葉晝昏山欲合
藤花雪白徑微通

老僧

闕

我君親念一卷琅函答太空

留別陸芳潤張孟膚田仲耘王孟翼

楓葉殷紅枳實肥蘋風蕭颯
芰荷衣自甘許汜求田去
不擬劉蕡下第歸日落大荒
猿夜哭天含積水鶴雲飛
諸君有待乘槎使直犯星河
織女機

故湖口縣主簿蔡君挽詞

有序

君名德榮字景華揚州人也至正十五年從淮南省
臣出征累勞授將仕佐郎湖口縣主簿明年春三月

揚失守將扈鎮南王北奔

闕

執之

闕

將命以官

力辭

闕

羈縻于吳卒君之子平江錄

闕

徹友于予一

日泣拜曰徹先君家素饒好濟賢士之貧者卒不望

報好飲酒客或沈湎廢禮亦不之退鄉里用是稱長

者然不幸遭亂死尚幸節不失徹

闕

忝斗

闕 祿為老母養實先君遺靈是祐

闕

地下

惟先生垂一言而顯白于世則幽潛之闕徹之至願也予嘉徹孝乃叙而詩之詩曰

不識中郎裔咸稱長者風
淥尊容潦倒金帛濟途窮
楊柳平山外瓊花后土中
亂離需一命慷慨抱孤忠
驥子飄零隔荆釵患難同
劍虹衝夜斗書帛斷春鴻
命也貧甘節天其夢吉終
山人追作誄應感九泉通

題僧教求傳先世姚氏遺事

有序

嘉定姚舜元字景瑞少拳勇以武功授宋保義郎平
江府東南副將守吳淞德祐改元為元至元十二年
其冬王師下平江君邑大族民樂肺腑有弟舜賓子
應龍興龍應龍登咸淳間第太學上舍相感舊曰國
家厚澤在人大本未去收合散亡應內援外事可濟
也未幾王師偏將東狗莫敢犯境十二月十六日會

闕

塞襲兵卒至咸死之上舍子復明易侍讀學

士北庭

闕

公最友善嘗叙其詩集今靈隱書記僧祖

教復之中子子闕為曾孫謂予以遺烈告予謂其先
為臣能忠死為弟能義死為子能孝死忠義孝萃于
一門而可使之無傳乎教泣載拜曰願有傳也乃述
其槩繫以詩詩曰

賈勇收餘燼驚心壓大兵虬螭曾少援葵藿本同誠尺
伍開符籍孤虛識陣營青烽闕入望銅斗夜傳聲朔吹

刀如闕南闕益未傾小臣甘效死間氣忍偷生江洵濤

沙合星流霧瘴橫一門忠孝行闕尚含情

題邵氏家譜有引

邵自康公至東陵侯平凡五十世又八世至東漢左

中郎馴召始加邑又

闕

十世至唐名旺者為濛源府

君從睦州遷居淳安之諫村支派

闕

蕃衍宋有吳越

邵子孫以先世唐尚書左僕射

闕

直刺史若虔州思

括滑州行封歙州裕期湖州叶丹徒尉符并州刺史

强右武衛兵曹肅會稽令顯濮州刺史儒官誥詣有

司帖授衣冠戶時開寶八年又十三世名桂子為宋

處州教授有別業在華亭處州孫亨貞出示族譜逢
敬題是詩

宋日衣冠戶唐朝德澤門變遷支派異貧賤典刑存
盛青雲合崇高玉露繁蜜房蜂祝子香壘燕生孫誥護
先王勅車留太守轡一家天與貴百世海涵恩歲有團
圞樂春多語笑溫齒非論犬馬祭每課羔豚服任總麻
盡心期禮義敦國風詩在魯山脈氣朝崑伊呂曾為匹
朱陳近結昏公侯必復始尚憶諫名村

和宋理問見貽韻

風雨懷賢夕東南厭亂時湖翻波自洶天聳聽還卑倦
塌鷹鷂翼紛張蜃鱷頤終童繻早棄直使斧先持晁錯
兵三策陳平計六奇金銜龍口劍清絡馬頭絲草接春
程濶花穿午漏遲明珠還甕社白兔獲符離方物通諸
貢民生免百罹偶存丘壑想遂保棟梁姿寵利從爭效
才名任詆嗤由來

闕

後兩

闕

跡異商歌綺功

收蜀將維武經閒虎

闕

卧犀毗

闕

日猗玗洞明年

赤玉墀五雲瞻繚繞湛露挹華滋車笠盟誰望烟霞疾

我私紫垣星北極茅屋地西枝嗜

闕

元

闕

退子

綦鄉山瞰蓬海黃髮候安期

謝

闕

院使枉顧

漢節驅前隊吳

闕

夾

闕

肯來

闕

白屋迴異過高軒葛

亮煩三顧醴明契一言君王憂社稷臣子瘁藩垣碣石

深淪海黃河不改源日知陳俎豆夜想屬橐鞬客忝游

從數家承禮義敦風流賢謝傳

闕

大鄙公孫鈴響花連

閣舟橫柳暎門春來足清暇誰與省雲騫

送兵部使賈彥彬北還二首

有引

彥彬名文質晉寧人嘗以都水監奏差押兵部馬赴
安豐還次全椒遇亂幸不死側身草野凡數年始獲
奔浙省省臣嘉其鋪馬聖旨在上之中書逢勞以詩
云

天上小行人金椒犯敵塵九年君入望萬死鬼為鄰星
轉蒼龍近船歸綵鷁新殊恩酬苦節悲喜集茲辰

使臣金壁返行色澹婁臯毛落蘇卿節緋寒范叔袍柴
桑空月冷桐柏尚峰高有問征東策天兵勿自鑒

哭沈先生

有序

先生諱蒙字伯亨西秦人從子方陸公學既侍父官
於潛因遊天目山作記累千言復唱古詩百韻一時
坐客咸斂衽謂才足追配海粟馮公之賦時年十九
耳平生明春秋尚書淹貫子史百氏學氣節踔厲累
應試不中拓落江淮間二十年日寄傲于酒貴富人

莫能下後江陰亂偕友趙乾宗往依馬洲鉅室未幾
亂兵執先生索鉅室主卒不言遂與趙遇害哀哉逢
避地遐命兒掖錄先君庫使行狀妣李氏傳感先生
大手筆足以發揮潛德嗟先生不幸死而言行之懿
則非逢所能述也姑哭以詩

三楚皆兵祲中洲自樂郊不虞烏啄屋竟作燕焚巢氣
節摧強敵文章哭故交家山限天塹瞻拜奠蘭肴

寄汪用敬劉彥肅二憲郎

太尉新開府諸曹舊直臺節毛通萬乘旗羽拂三台路
遶青州出烽從赤壁來英雄滿麾下叅贊屬奇才

題堅上人石林圖

石林禪隱地萬木擁巖礧風露蒼寒濶雲霞玉氣高採
花猿放供銜果鹿忘勞亦有清吟客時同步紫鰲

何禮部國器留晚酌得飛字

晚酌尚書第杯光照客衣錦箋魚並躍銀燭鳳交飛疎
樹風涼進幽蘭露氣微喜聞謙退語不減在郊扉

贈多阿克進士

分攜十六載兵後見殊鄉道在衣從短時來面覺方
苑花鶯嘒日邊草鴈啼霜出處關文運燈前且盡觴

贈王菊隣

白露秋香外君家若箇邊神交陶靖節地主傅延年
採對蒲城酒餐同橘井泉宗人有王翰行咏卜鄰篇

寄邁善卿憲幕時總戎越中

憶同沙進士訪我大江濱座酌烏程酒篇連賈董文瓊

林依日月禹穴會風雲極目窮南紀書生將一軍

貢玩齋尚書邀往西山觀程以文員外葬地值雨

作

旌榮澹秋色衣沾疎雨涼身忘侍從貴義急故人喪地
隱牛眠穴山回鳳舞岡河干先墓表百世耿相望

哭信州總管靳公二首

有引

公諱仁字利安弟二人義字

闕

宜太平路總管守節

死贈河南省左丞智字士達浙憲知事卒並有材德

世重憐才義人趨讓廕風鯉庭承孝友鶴髮佩公忠日
月迂花萼嵩邱隔桂叢一門三采鳳無愧薛河東
令弟皆知已巖廊兩薦名乾坤離亂日金石死生情牛
渚孤忠耿烏臺爽氣平高天鴻雁今好在洛陽城

題虎樹亭

有引

趙宋聰禪師住華亭

闕

時有二虎噬人師降伏之

命名曰大青小青師卒虎亦死弟子瘞之塔傍踰年
生銀杏樹二今尚存主僧隱公闕亭樹間扁曰虎樹

徵逢題是詩

舟泊東西客詩招大小青山高白月墮草偃黑風腥植
物鍾英爽精藍被寵靈涼陰慎翦伐留護石函經

澱湖舟中懷謝府倅履菴

月破山河影天垂霧露陰西風寒不競東井夜空臨獨
櫂滄波濶疎燈落木深無官卹民隱思爾細論心

寄衡良佐御史

昔忝左丞客屢陪賢佐遊論兵雪驛夜觀稼石門秋大

器已驄馬不才還敝裘天風動書劍思載剡溪舟

寄南臺經歷察士安

傾蓋庾氷宅賡歌黃歇山鹿麋任野性鵷鷺老朝班
寔石亂雲裏研池脩竹間遙知草奏暇游馬夜深還

登吳山三茅觀訪貢尚書留宿口號

湖光湧殿壁石黛長岩根

闕

誰騎虎披衣客聽猿天

經南海濶斗輔北辰尊竟夕

闕

座溥溥竹露繁

同楊鉄厓雨坐

野濶大溪橫苔梁翠碧

闕

終日坐微雨四簷聲爐

裏庭花氣衣含水木清何常

闕

同上錦官城

謝王李野馬東臯

闕

枉顧

白馬搖雙轡青童扣獨

闕

雲火日心在薜蘿衣本

為吹笙過無因待鶴歸秋齋帶

闕

清坐莫相違

寄烏延子忠廉使

詔開神策府星麗

闕

微垣

闕

深秋正湖波舊日翻鷹

蒼拳玉立驥伏志雲騫亦有

闕

三年望帝閣

贈章彰德吉父

致仕章彰德雲間負重名義田春雉雠書閣夜燈明諸
舊依妻子孤臣謂楊乘外寄死生黃金日圍帶躬導板輿
行

寄魯道源提學

謝病儒臺客從來結友

闕

官辭板授弟子賴經明孔

座尊常綠雷津劍合鳴嘉魚厭客邸只少各歸畊

簡黃心之同知

夜宿松陵館湖開一鏡星蛟潭積水黑蟹屋亂燈青漂
泊身垂老疎慵酒復醒慙君在官守憑軾慰零丁

題謝疊山先生所撰高士薛君墓誌銘後有序

君名伯英字俊夫號秋潭青溪儒家子也學老子于
龍虎山理宗朝以術排潮復驅旱魃咸有徵召見復
古殿甚異之事父母孝友于兄弟上清宮有古琴善
琴者以為東南奇寶流落塵人家四十年君見曰此
山中舊物人所共珍何忍使同俗物乎謀厥弟空囊

中得錢千緡贖歸與其徒共之有弟為游士累貪吏
因羅織之勢窮矣君盡力以救不足則率兄弟為士
農者傾常產以脫急難謝先生曰以君志誼措為天
下用豈肯聽祖宗神州赤縣淪沒百三十年而不歸
乎豈肯視生靈怨愁國步顛危而不一策拯救乎
韓退之見當世無偉才朝廷無忠臣義士遂疑忠信
材德之民迷溺于佛老之教而不一得廖道士驚
喜如見異人吾嘗恨不見廖道士者矣惜吾生同郡

金
三
而不及與之言也其推重若此君咸淳六年卒族曾
孫毅夫以詩請敬題四韻

野服辭天子山居味道真力能歸舊物義不外彝倫雨
協雲霓望潮回白馬神仙風高百世讜論感孤臣

寄黃仲瑱山長

三度貢春官中年樂考樂韋編百氏易緇布古時冠雲
漢星疎曉江淮月落寒高堂枕泖曲獨遺子孫安

題張明叙安然堂

嘉遁張君子安然扁野堂一身離寵辱六鑿罷搶攘對
酒鶯來下看書筍過長青山忘賓主白髮任行藏

避地養疾寄謝吳桂隱張清遠黃璟和張柳庄

落日愁無那徂冬病不斟杖藜疎木下藥火閉門深琴
歌陽春曲書親夜氣箴朋游數餽問益見子興心

題謝縣丞李初玩竹軒

明府深居竹淇川不啻過虛心待物久素節守官多雪
影魚竿瘦春聲鳳律和更栽花滿縣相映澱湖波

題余寅景晨雨繻亭

孝子亭何處，籛山蒼翠陰。
簷花中夜滴，墓木百年心。
盼蠻通冥遠，神龍澤物深。
焚香肅冠珮，謦欬有遺音。

過姚孟麟元鱧佘山溪堂

堂依佘北澗，泥滓淨毫纖。
空翠潤侵幌，水衣光動簾。
燕毛情每洽，薦鮪味時兼。
一酌佳兄弟，家興讓與廉。

過馬天章水村居

嘉興馬錄判，歸築水村居。
土銚長腰米，尊羹巨口魚。
青

衫沾露薄華髮向秋疎尚爾丹心壯無時去玉除

題謝頤素一勺軒

一勺源頭水當軒晝夜渟鑒心塵弗昧育德藻同馨
玉匣開天象冰壺泄地靈山人研池渴分得小龍腥

題唐子雄照磨博雅堂秦景容郎中為序

博雅堂高闢君應慕古初交龍座右鼎科斗架頭書性
樸時多忤居深跡自疎少游大手筆不啻重瓊琚

登朱聰孟律海月樓

樓居延海月入訝小冰壺平地流銀漢中天倒白榆兔
蟾秋並浴蚌鮎夜相濡只尺驪龍睡無心摘領珠

哭成元章

諱廷珪與丁仲容先後日生李坦之張仲舉咸至交好有詩倡和

淮海成遺逸詩吟字字精每稱盧八米堪敵李長城虹
日衝雲赤霜風落木清計聞張祭酒涕淚想沾纓

名後登龍李生同化鶴丁看花頻后土裴茗或中濡世
事餘黃石朋游半列星何人諡貞曜永為賁泉局

近故二首

近故儒林老於予起嘆嗟清秋書柿葉落日賦桃花碑
碣留吳滿雲山向越賒多情楚宮月來照未栖鴉
近故維揚老威儀本漢官才高三禮賦心折一泥丸露
氣金盤濕簫聲碧落寒空餘茂苑樹鵲血幾時乾

鄰飲

蠟炬遶紅鸞盆花玉露溥無家憎月色多難薄春寒毛
穎時旌鬼黃金少鑄官西鄰濁酒熟得罄一回歡

趙待制木石為張怡雲題

湖舫雪飛鷗湖堂山

闕

木石寫高秋對

酒忘新樂

闕

武林道中

風雨孤舟客乾坤一葉身久憂龍戰野翻作鳥依人山
赭嵐光薄田萊水色新忍言疇昔夢歌舞送鷺辰

舟中值雨寄廉清忠許澄江二山長

野艇入淹泊湖天雨往來草牽春緒亂花倚暮寒開積
水鮫鳴杼長堤蟻潰臺襄王限楚澤宋玉漫多才

題鍾氏亭子

愛爾亭如舫，繁陰滿四楹。
月高聞露滴，春遠惜鶯聲。
烟直香逾細，杯深酒益清。
翻嫌衆綠暗，爭賞一花明。

寄傅文博御史兼簡丁彥誠知事

微疾感霜露，客居驚歲寒。
遙紆長者轍，還戴惠文冠。
世亂窮途早，家貧一飯難。
春來幸勿藥，思與奏猗蘭。

寄蘇上海彥祥兼簡李教諭

楓盡荻花乾，蒼茫海國蟠。
莫窮三尺法，須貸一分寬。
集

吏朝鳴鼓憂時夜整冠高情繼蘇頲應念廣文寒

懷楊彥常編修

落月夢千里故人天一隅名高藝文傳才大廟堂謨申

白舊賓楚鄒枚終去吳河水泮新綠應已賦三都

寄闕鼇海掾郎兼簡宗燈二上人

省郎前進士裔出素封家畎畝寸心赤風塵雙髻華玉
衡低虎觀金柳亘龍沙寺壁詩千首煩僧覆碧紗

簡林仲寔主簿

休官林主簿數數問幽居野飯狼牙菜山醪鹿角刀
圭知有術光範喜無書想見徵龐統花迎別駕車

簡陳野航主簿

畫舫古琴書青袍雙珮琚詩題梁紇廟恩注白公渠訪
舊論心密傷時任法疎人傳飲淞水不食四腮魚

聞畿甸消息

白草生畿甸黃沙走塞庭直憂星入斗兼畏雨霖鈴殿
閣餘龍氣衣冠自鵠形吳粳斷供餉隴麥向人青

辛丑四月朔西日下黑氣相盪久之口號八句

躍馬羣雄日歸鴉薄暮時正傷雙目短又見太陽虧野
老相扶拜天王豈宴私金戈望南國應似魯陽麾

春寒

天水新歸蜀齊城舊入燕可憐羈旅士重越亂離年日
晏還晞髮春寒懶著綿無情野桃李風雨亦成妍

題歲寒橋

有引

至正壬辰七月十日徽寇犯杭時樊時中執敬為浙省

叅政亟禦于橋遂死之

大叅身死歲寒橋忠血長流憤未消一片王孫烟草色
岳墳松柏共蕭蕭

奉題清碧杜隱君為先子隸古西銘太極圖說後

武夷仙權泊溪雲曾寫西銘太極文叅政

謂周公伯溫

留題

猶六載草堂新對一爐熏

奉題文丞相小像

贊附

中齋鄧公光薦贊曰目煌煌兮疎星曉寒氣英英兮

晴雷殷山頭碎柱兮壁完血化碧兮心丹嗚呼孰謂
斯人不在世間虛谷方公回系贊曰始見可畏再見
可愧三見出涕噫千萬世

何代忠臣事二君先生一死重斯文後來故國多登相
傳說孤星燭暮雲

奉題曹先生柏牕卷

有序

先生諱思順字彥信柏牕其號也厥先自昇徙梅李
宋初復徙江陰五世至文雅生碩咸隱居教授碩以

子璉湖南提刑貴贈金紫後有三昆弟聯登進士者
故所居坊名藪桂先生益金紫十四世孫嶷重謹言
明易浙憲呂公思誠薦授儒學官再除以大母酈春
秋高遂弗仕至正乙未遭亂病卒有遺藁十卷子博
美文行女淑靖蚤寡守節淑清淑寧並不辱死逢僭
當銘墓曰吳季子邑大江隅曰大姓族曹莫踰歷二
十世家守儒公兩典教光前模桂百斯葉一葉數中
復瘁只吾何吁天其好還昌爾孥至是復題是卷云

詩曰

藂桂坊西古柏青
韻含風露雜琴經
先生久作芙蓉主
喜有餘陰覆鯉庭

春霜

天家青女試春霜
細藻微波凍野塘
茅屋布衾誰道薄
隄囂宮合瓦鴛鴦

和惠子及雨中五首

草閣寒多帶水陰
雨餘江鳥自浮沈
鬢毛漸比吳絲白

春色都隨社酒深

桃花昨夜愁盡發燕子今春疑不來雪衣鸚鵡亦可怪
錯喚主人非一回

今春又值甲子雨十年之前人日晴東風誰家作花信
白水滿堦如雪明

鶉鴝喚雲雲不開紫茵生榻蝸行苔五花誥身酒市賣
一葉野舟天際回

小范宅前花霧開正要惠子白驢來春波鴨綠酒一色

飲酒對花須百杯

和趙女謝世韻

有序

南臺掾趙晉女生而秀慧自幼愛讀列仙傳母怪問
曰列仙傳何如列女傳女笑答曰某有夙習乃爾或
聞人請婚輒謂母曰凡求婦為養舅姑承祭續後也
不以實辭而聽其納采脫物故其失三者之望必母
氏是尤遂辭之年廿六一夕命婢具紙筆題詩曰
九重縹緲黃金闕十二玲瓏白玉樓明朝了却人間

夢獨跨青鸞自在遊端坐至曙而逝文學書院山長
樊君浚傳其事屬予與許棨各和一首棨曰遍地風
塵連水國九天月露滿瓊樓青鸞背穩星河近先從
西池阿母遊浚字文淵廣信人棨字友常吾鄉佳子
弟也予曰

闕

闕開福地采雲五鳳敞紅樓無情莫伴天孫織

有樂還同婺女遊

題趙文敏馬

蕭蕭首霜起秋風隱隱黃雲沒塞鴻可愛南朝趙公子
尚留先世玉花驄

題陳希夷睡圖

華山松樹倚雲臺五季龍爭眼倦開未必先天叅妙理

墜驢一闕來

題李唐江山烟雨圖

烟雨樓臺掩靄間畫圖渾是浙江山中原板蕩誰回首
只有春隨北鴈還

齋居四首

野堂人遠晝深沈
鳳裊爐香度玉琴
黃耳卧當蕉葉下
畫看啼傍石榴陰

坡石幽花駐夕曛
研池飛絮弄春雲
故人書拆南牕下
多是稱呼作隱君

有酒不煩人問字
無金仍望子收書
如何話得幽居好
一箇鶯啼春雨餘

花嶼生寒雙袖露
酒波動影滿天星
女兄強健身閒樂

稚子時時過草庭

邵景誼席上醉題

五茸三泖水雲寬
幾處春移草亦寒
惟有種瓜門業盛
牡丹花到子孫看

夜宿岳氏醉題

霧重魚生翼
山昏虎變文
列星如品字
知是羽林軍

題瞿睿夫鈎勒行

我嘗宴龍君
醉躡白鳳尾
都將蒼梧雲
零亂瀟湘水

題猿圖

霜清月白時冷掛長松枝想愛玉澗水弄影照鬚蒼

趙待制畫為邵臺掾題

有序

丁酉仲夏予自梁鴻山復辟地青龍鎮遇風恬月霽
或木脫水落輒命童孥小舟延緣黃浦淞泖間無以
形容身閒心樂也嘗擬權歌曰月明濯足龍江口木
落題名鳳山首三泖天低一幅巾五茸露瀉雙餅酒
道逢船子歌載過季鷹拍手龜蒙和澱湖慘澹神姑

迎魚波鱗鱗鏡光破又曰靈胥潮落龍華步少女風
生蝦子渡蒼葭兩岸船獨搖紅葉千村塔微露前峰
四五先我揖龜魚踴躍蛟起立銀河滄海氣同流頭
戴青天如窮笠及己亥秋遊抗戶部貢公泰甫以予
久屏城府之跡夙徂泉石之好乃一日邀集賢趙公
仲穆宴予湖山真館于時境延虛清座挹勝賞偶舉
是歌趙曰斯氣象殆非有聲畫而已然畫當屬之我
也衆相顧大笑未幾圖成予詩謝曰魏國佳公子烟

波小釣徒偶同觴詠樂得寫擢歌圖林木巢春燕藪
祠嘯火狐終焉隨蹈海不敢嘆乘桴自後有以蕭山
令薦予者予還寓隱既邊報急聞趙亦歸雲上以卒
今年甲辰彥文邂逅吳江示趙所畫綽有擢歌景予
語以此彥文俾歷叙詩左云

天目凝神外由拳望眼中霜清下木葉得與醉垂虹

書宣妙春雨田上人佘山禪房二首

鐘鳴林采曙衣冷山氣夕時復煮茶香烟籠半簷白

松風琴虛絃雲磴履落齒坐來木榻穿爐香一盃水
吳中步雲洲道士事老寡女兄甚至為贈絕句
看經得錢幣置酒奉女兄儼衣紫霞帔同上青雲城

題珉西崑開士冬筍軒

雪中筍斑斑如兒在襁抱兒叅玉版師親年如竹老

馬頭曲 有引

馬頭者大都名姬也始為黃禪太子寵黃禪伏誅沒
入以賜太平王王薨子騰吉斯留之騰吉斯被巴延

太師殺復沒賜伯奇伯奇國語力士也柯鑒書九思
嘗賦曲准東憲史張彝言之予擬小詩六章適外甥
俞董至因命董與兒掇撮足其意亦止乎禮義云爾
衛風黍無倫春秋濫不止鄙哉金谷園綠珠乃肯死
和戎漢明妃亡吳越西子鬼妾賜元臣孰受盧弓矢
前時楚襄夢令夕伶玄妾瓊斷藍橋漿紅流御溝葉
香熏舊繡衣鏡改新妝面只有闕情不解湘妃怨
珊瑚近沒官鸚鵡亦更主一闕年年自江浦

君仁邁曹瞞妾賤慚蔡琰築臺有羸金蘆笳不長掩

春星復在隅秋水仍含盼本非東家蝶失奠西階雁

董

花飛漢宮燕天遠秦臺鳳載駢脇郎願同山頭夢

鑿刀剗燔羊官甕瀉

闕

掖

王門激楚曲相府西涼調愁中換宮商郎毋省妾笑


蜥蜴飼丹砂鴛鴦置金鎖東風獨何情楊花起還墮

攝

妾身汨泥塗妾心暴天日後來未亡人願似孤兒恤

萱圖為李恒題于茂清軒中

暄風宜男花涼日忘憂草一種兩含情親容夢中老



梧溪集卷三